



## **Aningaasaqarnermut Akileraartarnermullu Naalakkersuisoq**

**Ulloq:** 11. december 2017  
**J.nr.:** 01.31.06/17-00771

### **Aningaasaqarnermut Akileraartarnermullu Ataatsimiititaliap pingasunngornermi ulloq 29. november 2017-imi aalajangiineranik Naalakkersuisunut ilisimatitsineq.**

**Konto pingaarneq 40.98.02 Nuna tamakkerlugu digitaliseeriinissamut periusissap  
atuutsilernissaanut ilassutissatut aningaasaliissutinut oqaasertaliussap allanngortin-  
nissaanut qinnuteqaat - Sags nr. 01.31.06/17 - 00771.**

”Naalakkersuisut **inassutigaa**,

*una* Konto pingaarneq 40.98.02 Nuna tamakkerlugu digitaliseeriinissamut periusissap  
atuutsilernissaanut 2017-imi ilassutissatut aningaasaliissutinut inatsisissamut siunner-  
suummut oqaasertaliussap allanngortinneqarnissaa, ilanngussaq 1 tunngavigalugu  
siunnersuutip matuma akuerineqarnissaa”

### **Aningaasaqarnermut Akileraartarnermullu Ataatsimiititaliap oqaaseqaatai apeqqu- taalu:**

Naalakkersuisut ilaatigut paasissutissiipput:

*”Siunnersuummi matumani qinnutigineqarpoq Naalakkersuisut akuerissagaat matuma-  
ni ilassutitut aningaasaliissutinut qinnuteqaammut, konto pingaarnermut 49.98.02-mut  
Nuna tamakkerlugu digitaliseeriinissamut periusissap atuutsilernissaanut oqaaserta-  
liussap nutaap Inatsisartut Aningaasaqarnermut Akileraartarnermullu ataatsimiitita-  
liaanut nassiuqqassasoq. Oqaasertaliussami tassani qinnutigineqarpoq nuussinissa-  
nut piginnaatitaaffik atuinerunerit atuinikinnerunerilluunniit 2017-mi 50%-mit qummut  
tamakkiisunngorlugit qaffanneqassasut.”*

Paatsuungasoqqunagu oqaatigineqassaaq oqaasertaliussaq nutaaq pineqanngimmat, pine-  
qarlunili oqaasertaliussami atuuttumi oqaasertanik allanngortitsineq, tassani aningasaliissutit  
50 %-ii ukiumut tullermut nuunneqarsinnaanerit pineqarami.

Ataatsimiititaliap maluginiarpaa Naalakkersuisut suliaq manna pillugu ullorli 10. oktober  
2017 saqqummiussivigineqareersut. Ataatsimiititaliap isumaa malillugu 2018-imut Anin-  
gaasanut Inatsisissatut siunnersuutip suliarineqarneranili Naalakkersuisut suliaq manna  
isumaliutigereersimasinnaagaluarpaat.

Aningaasaqarnermut Akileraartarnermullu Ataatsimiititaliap Naalakkersuisunut allakkatigut  
ulloq 7. november 2017-imeersutigut ilisimatitsissutigaa, aalajangiinissamut tunngavissat  
amigarmata suliaq manna pillugu isummernissani kinguartissimallugu. Ataatsimiititaliap  
taamaammata suliaq pillugu aalajangiisinnaatinnani apeqqutinut akissutisinissamik ujartui-  
voq.

Naalakkersuisut akissutaat ulloq 17. november 2017-imeersut ataatsimiititaliap qujassutigai. Ataatsimiititaliap suliami aalajangiussinerminut tunngavilersuutitut makkuninnga oqaaseqaateqassaaq.

Ataatsimiititaliap allakkiamini siullermi imatut apeqquteqarpoq:

**“Apeqquut 1:**

*Naalakkersuisut inassuteqaatertik aalajangiusimavaat, naak taanna ataatsimiititaliap isumaa malillugu ukioq manna iluaqutaassuseqanngitsoq, taamaattumillu pisariaqanngitsutut isumaqarfiginartoq?”*

Naalakkersuisut akissummini inassuteqaatiminnik, tamatumunngalu tunngavilersuutiminnik aalajangiusimannipput. Taamaallaat Aningaasanut Inatsimmi aningaasaliissutissatut immikkoortinneqartunit 19.224.000 kr.-iusunit atuinernermik atuinikinnerunernillu ukiumut aningaasaliiffiusumut tullermut nuussisoqarsinnaanernerminnik Naalakkersuisut attassipput.

Ataatsimiititaliap naliliinera malillugu Naalakkersuisut oqaasertaliussaq malillugu atuinernermik atuinikinnerunernillu nuussisinnatitaanerata atuuq, aningaasaliissutit sapinngisaaq naapertorlugu atorluarneqarnissaannik Naalakkersuisut qulakkeerisinnanernannik killiliinngilaq. Missingersuusiortarnermut inatsit malillugu aningaasaliissut tassaavoq erseqqinnerusumik aalajangersakkat malillugit atuisinnaanermut Naalakkersuisunut ataasiakkaanut piginnaatitsineq. Ukiumut aalajangersimasumut aningaasaliissut Aningaasanut Inatsimmi aningaasaliissutikkut, ilassutut aningaasaliissutikkut oqaasertaliussakkulluunniit aalajangersagaasinnavaoq. Oqaasertaliussat inatsisikkut aalajangersagaapput aningaasaliissutit aqunneqarnerannut tapiutitut atorneqartartut. Naalakkersuisut taamaalillutik aningaasanik atorneqanngitsoortunik 8.059.000 kr.-iusunik 2016-imiit 2017-imut nuussisimapput. Taamaalilluni 2017-imut aningaasaliissutissatut aalajangersagaareersoq 19.224.000 kr.-iusoq ilanngukaanni aningaasaliissutit tamarmiusut 27.283.000 kr.-iulerput. Ataatsimiititaliap isumaa malillugu aningaasat taakku tassaapput Naalakkersuisup akisussaasup 2017-imi atorsinnaasatut (aningaasaliissutitut) oqartussaaffigisai. Naalakkersuisut aningaasaliissutit taakku 50 %-iinik 2018-imut nuussisinnatitaapput.

Kontumut pingaarnermut pineqartumut aningaasaliissutit 2016-imi 4,5 mio. kr.-inik qaffanneqarsimasut 2017-imut aningaasanut inatsimmi erserpoq. Taakku 2016-imiit nuunneqarput, taamaalillutillu 19.224.000 kr.-inut taakkununga ilaanatik. Qulaani oqaatigineqartutut Naalakkersuisut taamaallaat Aningaasanut Inatsimmi aningaasaliissutissatut immikkoortinneqartunit 19.224.000 kr.-iusunit atuinernermik atuinikinnerunermilluunniit ukiumut aningaasaliiffiusumut tullermut nuussisoqarsinnaasorinninnerminnik attassipput. Tamatuma nassatariinnarsinnaasaanik 4,5 mio. kr.-it taakku aappaagumut nuunneqarnissaat kissaatigineqartunut ilanngunneqarsinnaanngillat. Ataatsimiititaliap ilimaginngilaa tamanna qinnuteqaammik matuminnga siunertaasoq.

Tamatuma saniatigut Naalakkersuisut ataatsimiititaliamut akissummini paasissutissiissutigaa, Ilanngaassivik atorinneqalissappat tamatuma 2019 ilanngullugu ingerlanneqarnissaa naatsorsuutigineqartariaqartoq. Ataatsimiititaliap isumaa malillugu tamanna ataatsimiititaliap pisarialik naapertorlugu naammattumillu aalajangernissamat tunngavissaqannginneranik naqissusiiginnarpoq. Ataatsimiititaliap eqqaasitsissutigissavaa Naalakkersuisut 2018-imut Aningaasanut Inatsisissatut siunnersuummi oqaasertaliussanik allannguinnikkut, 2018-imi atuinernermik imaluunniit atuinikinnerunermik 2019-imut nuussisinnatitaasut. Ataatsimiititaliap isumaqarpoq taamaannerata qinnuteqaatip matuma pisariaqarnera annikillisingaat-siaraa. Suliaq siumut naatsorsoruminaanera eqqaassagaanni Naalakkersuisut, tamanna

pisariaqalissappat, ukiumut aningaasaliiffiusumut 2018-imut ilassutitut aningaasaliissutissa-  
nut qinnuteqaammik nassiussisinnaassapput.

Ataatsimiititaliap maluginiarpaa ukiumi aningaasaliiffiusumi matumani periusissiami suli-  
niutit qulequttanut arfinilinnut agguataagaasut, AIS2018-imi qulequttanik allanik nutaanik  
taarserneqarsimasut. Taamaammat ataatsimiititaliaq imatut apeqquaqarpoq:

**“Apeqqu 4:**

*Tamanna eqqarsaatigalugu suliniutit maanna katitigaanerannut qulequttat arfinillit  
nutaat qanoq sunniuteqarnissaasa maannangaaq paasinarsisinneqarnissaa pisaria-  
qartoq ataatsimiititaliaq isumaqarpoq.*

*Suliniutinut piffissaliussaq aammalu suliniutitut siunertamut aningaasaliissutaasut  
nalunaarlugit suliniutaasinnaasunut aalajangersimasunut nutaanut takussutissiaq  
ataatsimiititaliamit kissaatigineqarpoq.”*

Naalakkersuisut ilaatigut akipput Digitalingorsaanermut periusissiamik suliaqarneq inger-  
lanneqartoq, taamaammallu apeqqu maannangaaq erseqqinnerusumik akineqarsinnaan-  
ngitsoq.

Qulaani allassimasut tunngavigalugit ataatsimiititaliaq isumaqarpoq taamatut oqaaseqarneq  
oqaasertaliussamik pioreersumik allangortitsinissamik pisariaqartitsinermik annertuneruler-  
sitsinngitsoq. Naalakkersuisut paasissutissanik allanik saqqummiussisimannngimmata ataatsi-  
miititaliap suliaq pillugu naliliinerminik attassisariaqarpoq.

Pissutsit allat:


Pisiniartarfiit ilaannit nassiussat akiligassiissutillu kingusinaartarneri qinnuteqaammut  
matumunnga ilaatigut tunngavilersuutigineqarput.

Atortussanik pisiortorfiit ilaasa tunniussinerisa fakturaliornerisalu kinguaattoorfiusimane-  
nut tunngatillugu aningaasat qanoq amerlatigisut pineqarnersut paasissutissiissutigine-  
qanngilaq. Atortussat fakturallu kinguaattoornerannik suliassat suut kinguaattoorfiunersut  
paasissutissiissutigineqanngilaq. Ajornartorsiut tamanna uteqqiattuuppat aningaasaliissutinik  
pitsaasumik sukumiisumillu aqutsinikkut tamanna pilersaaruserfigineqarsinnaasariaqarpoq.

Kotomut pingaarnermut missingersuutinut ilanngussami allassimavoq siuariartortoqarnera  
pillugu nalunaarusiamik Naalakkersuisunut aammalu Aningaasaqarnermut Akileraartarner-  
mullu Ataatsimiititaliamut ukiut tamaasa tunniussisoqartassasoq. Konto manna pillugu  
immikkut nalunaarusiamik ataatsimiititaliaq tigusaqarsimannngisaannarpoq. Nalunaarusianik  
taakkuninnga toqqaannarlugu nassinneqartarnissaminik ataatsimiititaliap kissaateqarnini  
oqaatigeqqissavaa. Toqqaannangitsumik nalunaaruteqarfigineqartarneq ataatsimiititaliamit  
akuersaarneqarsinnaanngilaq, tamanna assersuutigalugu Aningaasaqarnikkut ingerlatsineq  
pillugu Nalunaarusiakkoorlugu.

**Aningaasaqarnermut Akileraartarnermullu ataatsimiititaliap aalajangiinera**  
**Aningaasaqarnermut Akileraartarnermullu Ataatsimiititaliap** qulaani oqaaseqaatit  
tunngavigalugit Naalakkersuisunit inassuteqaat **akuersissutigisinnaanngilaa.**

Ataatsimiititaliaq sinnerlugu



Jens Immanuelson

Aningaasaqarnermut Akileraartarnermullu Ataatsimiititaliap Siulittaasua